

---



## CANTIC AR BARADOS.

---

Var eun ton anavezet.

**J**ESUS! peguen bras ve  
Plijadur an ene,  
Pa ve en graç Doue  
Hac en e garante! *bis.*

Bêr cavo an amzer,  
Ne zanto nep mizer,  
O sònjal de ha nos  
En gloar ar Barados. *bis.*

Pa zellàn en ênvo  
Hac etrezec va bro,  
Nijal dìn a garfen  
Evel eur goulmic ven. *bis.*

Mes siouas, me chomo  
Betec heur ar maro,

Evel eur prisonnier,  
En eur c'horf zo pounner.

bis.

Pa vo heur ar maro,  
Neuze me guimniado  
Eus ar c'hic danjerus  
Adversour da Jesus.

bis.

Gant joa e c'hortoàn  
Ar moment divezàn;  
Hast ameus da velet  
Jesus va güir bried.

bis.

En heur-ze me esper,  
Gant sicour va C'hrouer  
Ar partach evurus  
Prenet dìn gant Jesus.

bis.

Qerqent ha ma vezo  
Torret va chadenno,  
M'en em zavo en êr  
Evel eun alc'hueder.

bis.

Tremen a rìn al loar  
Evit monet d'ar gloar,  
Var an heaul, ar steret

Me a vezò douguet. *bis.*

Neuze me lavaro  
Adieu da dud va bro,  
Adieu d'ar bed poannius,  
D'e bechouï danjerus. *bis.*

Adieu d'ar baourente,  
Adieu d'ar vanite,  
Adieu d'an trubuliou,  
D'an tentationou. *bis.*

Pelloc'h ne zoujìn qet  
Chalmou an drouc-speret;  
Biqen, nan, n'em zromplo  
Goude heur ar maro *bis.*

Goude heur ar maro  
Gant joa me a gano:  
Torret eo va chaden  
Ha me libr da viqen. *bis.*

Ar pec'hejou marvel  
Nac ar re veniel  
N'ellint qet m'attaqi  
Na biqen va zrec'hi. *bis.*

Me a chencho a stad  
 Evit va brassa mad;  
 N'em bezo nep glac'har  
 O quittât an douar.

bis.

Me velo discaret  
 Va oll enemiet,  
 Ha me victorius  
 Dre ho crac, va Jesus.

bis.

A bep-tu pa zellin,  
 Qement tra a velin  
 A gargo va c'halon  
 A gonsolation.

bis.

Percher ar Barados  
 Digor eus va gortos,  
 Ar Zent, ar Zentezet  
 Prest d'am diguemeret.

bis.

Piou allo esplicàn,  
 Gant joa el lavaràn,  
 An triumph a velin  
 Er gloar pa antrein.

bis.

Me vezo recevet

En pales an Drindet,  
E creiz an enoriou  
Hac ar melodiou. *bis.*

Hac eno evit mad  
Velimp Doue an Tad  
Gant e Vab eternel  
Hac ar Speret-Santel. *bis.*

Me a velo Jesus  
Gánt eun ær gracijs,  
O lacât var va fen  
Ar gaëra curunen. *bis.*

Pa em diguemero,  
Eus e beurs me glêvo:  
Deut, servicher fidel,  
Deut d'ar gloar eternel. *bis.*

C'houi, graguez ha merc'het  
Trec'h d'ar c'hic ha d'ar bed,  
C'houi pezo enoriou  
Evit ho victoriou. *bis.*

Sònjomp oll dre avanç  
Peguer caër recompanç

Zo demp oll preparet  
En pales an Drindet.

bis.

Er barados hepqen  
Ni a ello compren  
Petric dal an ênvou,  
O gloar hac o joayou.

bis.

Evit poanniou dister,  
Evit anqenniou bêr,  
Me vezoz paët mad  
Gant Doue, hor güir Dad.

bis.

O velet hon Doue  
Gant ar Zent, an Æle,  
Ni a vezoz contant,  
Hep aoun rac chenchamant.

bis.

Admirabl eo güelet  
Ar Verc'hez benniguet,  
Gant daouzec stereden  
A ra e c'hurunen.

bis.

Güelet a raimp ouspen,  
Renget en eur vanden,  
An Æle, Arc'hæle,

Oll o veuli Doue. *bis.*

O cana e music  
Canticou manific,  
O raï meuleudioù  
Da Grouer an ênvou. *bis.*

Güelet a raïm goude  
Adam, Abel, Noë,  
Abraham hac Isaac,  
Jacob, Joseph e vab. *bis.*

David ha Samuel,  
Ar Prophet Daniel,  
Ar Zent Patriarchet  
Gant gloar oll curunet. *bis.*

Ar Prophetet fidel,  
An Ebestel santel  
Hac an oll Verzerrien,  
Enor ar Gristenien. *bis.*

Curunet vint gant gloar  
Balamour d'ar victoar  
O deus bet gounezet  
Var an oll dyrantet. *bis.*

An oll Gonfessoret,  
 Pontifet, Doctoret,  
 Beleyen ha Menec'h  
 Ha Sent oll a bep lec'h.

bis.

Güerc'hezet a bep oat,  
 Sentezet a bep stat,  
 Graguez, Intanvezet,  
 Gant Doue curunet.

bis.

Eurusdet hep e far!  
 Dre avanç ni a car;  
 Te gonsol va c'halon  
 En peb affliction.

bis.

En oll boanniou calet  
 A gorf pe a speret,  
 Me sònjo deiz ha nos  
 En gloar ar Barados.

bis.

FIN.